

MARK Miðstöð margbreytileika- og kynjarannsókna

Center for Research on Diversity and Gender

1 gr. Almenn

Miðstöð margbreytileika- og kynjarannsókna (MARK) er starfrækt á Félagsvísindasviði Háskóla Íslands (HÍ). Að miðstöðinni standa kennarar og fræðafólk á Félagsvísindasviði sem stunda rannsóknir á sviði mannréttinda og mismununar, jafnréttis-, kynja- og margbreytileikafræða í víðum skilningi. Miðstöðin heyrir undir Félagsvísindastofnun með vísan til 27. gr. reglna nr. 569/2009 um Háskóla Íslands og 4. gr. reglna um Félagsvísindastofnun nr. 370/2009.

2. gr. Hlutverk og markmið

Miðstöð margbreytileika- og kynjarannsókna er vettvangur samstarfs rannsókna og fræðslu á sviði mannréttinda og mismununar, jafnréttis-, kynja- og margbreytileikafræða í víðum skilningi. Hlutverk og markmið miðstöðvarinnar er:

1. að stuðla að rannsóknum á sviði mannréttinda og mismununar, jafnréttis-, kynja- og margbreytileikafræða í víðum skilningi,
2. að stuðla að samstarfi við innlent og erlent fræðafólk og rannsóknastofnanir á fræðasviðinu,
3. að stuðla að tengslum rannsókna og kennslu á fræðasviðinu,
4. að sinna ráðgjöf og rannsóknatengdum þjónustuverkefnum á fræðasviðinu,
5. að efla yfirsýn yfir fræðasviðið, miðla þekkingu og kynna niðurstöður rannsókna með útgáfu, fyrirlestur, fræðslufundum, málþingum og ráðstefnum,
6. að stuðla að marktækri og markvissri stefnumótun, umræðu og framþróun á sviðinu í samstarfi við opinbera aðila, atvinnulíf og þjóðlíf.

3. gr. Stjórn og starfsemi

Ársfundur er æðsta vald innan miðstöðvarinnar. Rétt til setu á ársfundi eiga kennarar og fræðafólk á Félagsvísindasviði skv. 1.mgr. 1. gr. Forseti Félagsvísindasviðs skipar fimm manna stjórn og varamenn fyrir hvern þeirra til þriggja ára samkvæmt tilnefningu ársfundar MARK. Stjórnarmenn skulu vera aðilar að MARK skv. 1. mgr. 1. gr. Í stjórn skulu sitja bæði konur og karlar og skal þess gætt að hlutfall kynjanna sé ekki minna en 40% sbr. 15. gr. laga nr. 10/2008 um jafna stöðu og jafnan rétt kvenna og karla. Stjórn skiptir með sér verkum og velur formann og varaformann úr sínum hópi.

Hlutverk stjórnar er að taka stefnumarkandi ákvarðanir fyrir miðstöðina og fylgja eftir markmiðum hennar. Stjórnin fer með fjármál miðstöðvarinnar og ber ábyrgð á þeim gagnvart Félagsvísindastofnun og forseta Félagsvísindasviðs. Stjórnin hefur umsjón með starfsemi miðstöðvarinnar og sker úr í vafaatriðum sem upp kunna að koma um innri starfsemi miðstöðvarinnar eða aðild að henni. Stjórn ræður starfsfólk í samræmi við reglur Háskóla Íslands. Stjórnin skal funda a.m.k. einu sinni á ári til viðbótar ársfundi. Stjórnarfundir skulu boðaðir með a.m.k. þriggja daga fyrirvara. Formaður skal boða til stjórnarfundar óski stjórnarmaður þess. Fundarboð skal greina frá dagskrá fundar.

Stjórnin getur heimilað einstaklingum og rannsóknarhópum að vinna verkefni á vegum miðstöðvarinnar og skulu þau vera fjárhagslega sjálfstæðar einingar á ábyrgð viðkomandi.

4. gr. Ráðgjafarráð

Við miðstöðina starfar 5-7 manna ráðgjafarráð sem skipað er áhugafólki, sérfræðingum og hagsmunaaðilum á starfssviði miðstöðvarinnar. Skal þess gætt að hlutfall kynjanna sé ekki minna en 40% sbr. 15. gr. laga nr. 10/2008 um jafna stöðu og jafnan rétt kvenna og karla. Hlutverk ráðsins er að vera stjórn miðstöðvarinnar til ráðgjafar og stuðnings við starfsemi hennar. Ársfundur kýs ráðgjafarráð á þriggja ára fresti.

5. gr. Fjármál

Miðstöðin hefur sjálfstætt fjárhald en reikningshald miðstöðvarinnar skal vera hluti af reikningshaldi Félagsvísindasviðs Háskóla Íslands. Fjárhagsáætlanir og uppgjör skulu samþykkt af forstöðumanni og framkvæmdastjórn Félagsvísindastofnunar. Ábyrgðarmenn einstakra verkefna, sbr. grein 3, eru fjárhagslega ábyrgir fyrir þeim. Heimilt er að líta á slík verkefni sem hluta af fjárhagi miðstöðvarinnar að fengnu samþykki stjórnar hennar. Tekjur miðstöðvarinnar geta meðal annars verið fjárframlög frá HÍ, styrkir úr samkeppnissjóðum, greiðslur fyrir rannsóknatengd þjónustuverkefni, tekjur af útgáfu, framlög, styrkir og gjafir frá stofnunum eða einkaaðilum. Miðstöðin skal tryggja að fjárhagsáætlun sé gerð fyrir öll verkefni sem unnin eru á hennar vegum og gera þau aðgengileg forseta Félagsvísindasviðs.

6. gr. Ársfundur

Ársfundur MARK skal haldinn að hausti ár hvert. Stjórn hennar skal boða til fundarins með einnar viku fyrirvara. Tilkynna skal tillögur um breytingar á reglum eigi síðar en í fundarboði. Fundarboð skal sent öllum þeim sem aðild eiga að MARK skv. 1. mgr. 1. gr. Rafrænt fundarboð telst fullnægjandi. Eftirfarandi málefni skulu rædd á ársfundi:

1. Skýrsla stjórnar um starfsemi MARK á undangengnu ári.
2. Reikningar síðastliðins árs.
3. Fjárhagsáætlun næsta árs.
4. Kosning stjórnar skv. 3. gr.
5. Kosning 5-7 manna ráðgjafarráðs.
6. Önnur mál.

7. gr. Gildistaka

Reglur þessar, sem framkvæmdastjórn Félagsvísindastofnunar hefur samþykkt, taka gildi 15. desember 2015. Á sama tíma falla fyrri reglur MARK úr gildi.